

中國醫學群書

幼科要畧上篇

古吳葉桂天士甫著 皖南建德周學海徵之注

總論

按襁褓小兒體屬純陽所患熱病最多。世俗醫者固知謂六氣之邪皆從火化。飲食停留鬱蒸變熱。驚恐內迫。五志動極皆陽。奈今時治法初則發散解肌以退表熱。仍混入消導。繼用清熱苦降。或兼下奪。再令病家禁絕乳食。每致胃氣索然。內風來乘。變見驚癇。告斃甚多。附記世俗通套之方藥於左。不可不知。不足取法。按純陽二字須善體會。是生氣之涵。旺非陽氣之已充也。張景岳已有辨論。所臚治法亦非全不可用。只在用之得宜。惟禁絕乳食一層。近日惟揚一帶。竟有兒病日久。父母坐視其餓死者。而胃

氣衰竭。致邪內陷。更不待言。真堪髮指。只因將節字誤認作絕字。遂致流弊如此。

防風 荊芥 葛根 前胡 桔梗 木通

赤芍 荀子 厚朴 陳皮 山查 麥芽

枳殼 神麴 鈎藤 夏佐香薷冬佐麻黃羌活

兩三日熱不解

柴胡 前胡 黃連 黃芩 山梔 連翹

薄荷 葛根 木通 鈎藤 厚朴 枳實

瓜蒌實 丸劑必用大黃

四五日不解。但言食滯未盡。表裏不和。總以柴芩小陷胸。若嘔逆煩渴。用竹茹黃連半夏。若痰多喘促。卽用葶薤杏仁蘇子。荀子胆星貝母。甚者加牛黃。此皆

套法所當戒也

屢清消不愈便無方法。苟不變驚。必曰蒸骨孩勞。所用藥餌不分氣血陰陽。但知見症施治。如早涼暮熱。必用

地骨皮 丹皮 生地 元參 甘草 北沙參

石斛 知母

有痰加

蘇子 杏仁 貝母 橘紅 膽星 桔梗

其鈎藤 石斛 茯苓 穀芽之屬。每劑必用。總之取無故疲藥。待其自愈。倘有變證。希冀掩飾而已。

徐靈胎曰。此等藥總

在用之得宜。不對證。則不拘何味。皆能爲害。不必錄出。垂戒反滋疑惑。

按嬰兒肌肉柔脆不耐風寒六府五藏氣弱乳汁難化內外二因之病自多然有非風寒竟致外感不停滯已屬內傷其故何歟嘗思人在氣交之中春夏地氣之升秋冬天令之降呼出吸入與時消息間有穢濁吸入卽是三焦受邪過募原直行中道必發熱煩躁倘幼醫但執前藥表散消導清火通便病輕或有倖成病重必然顛覆錢仲陽云冀履不可近襁褓小兒余言非無據矣四十年來治效頗多略述其槩云

按穢濁吸入由三焦直行中道意指溫熱之類竊謂風寒亦有從口鼻吸入肺則令人驟然狂

效入胃則令人驟然狂吐初起無惡寒發熱表證既效既吐之後營衛不調微見寒熱者有之治法不宜發汗用麻黃羌活走表每致大汗而病如故須調氣溫中息風如桂枝生薑吳萸陳皮之品則

宜兼表散。又或因欬吐引動伏邪。宜參用風溫之法矣。

夫春溫夏熱秋涼冬寒。四時之序也。春應溫而反大寒。夏應熱而反大涼。秋應涼而反大熱。冬應寒而反大溫。皆不正之乖氣也。病自外感。治從陽分。若因口鼻受氣。未必恰在足太陽經矣。大凡吸入之邪。首先犯肺。發熱咳喘。口鼻均入之邪。先上繼中。咳喘必兼嘔逆。臍脹。雖因外邪。亦是表中之裏。設宗世醫發散陽經。雖汗不解。幼穉質薄。神怯。日期多延。病變錯綜。茲以四氣常法列左。

按前曰嬰兒肌肉柔脆。此曰質薄。神怯。豈得謂爲純陽。任意攻奪。

伏氣

春溫一症由冬令收藏未固昔人以冬寒內伏藏於少

陰入春發於少陽以春木內應肝胆也寒邪深伏已

經化熱昔賢以黃芩湯爲主方苦寒直清裏熱熱伏

於陰苦味堅陰乃正治也知溫邪忌散不與暴感門

同法若因外邪先受引動在裏伏熱必先辛涼以解

新邪繼進苦寒以清裏熱況熱乃無形之氣幼醫多

用消滯攻治有形胃汁先涸陰液劫盡者多矣按伏邪因

新邪引動而發者最多或因風熱或因風寒或因飲食或因勞倦但新舊兩邪各有輕重不同如新

邪輕一二日後已自無迹自可一意清理伏邪如新邪重斷宜急祛兩邪相併便難措手常見外寒

激動伏熱遷延日久熱邪充滿膈中淫溢腠理而寒邪避入經絡脂膜雖徧身大熱日日出汗寒自

不動治宜扶助正氣兼用行血通絡之品乃能發疹而愈此法世竟無知者

備用方

黃芩湯

蔥豉湯

新邪引動伏邪

涼膈散

清心涼膈散

風溫

風溫者。春月受風。其氣已溫。經謂春氣病在頭。治在上焦。肺位最高。邪必先傷。此手太陰氣分先病。失治則入手厥陰心胞絡。血分亦傷。蓋足經順傳如太陽傳陽明。人皆知之。肺病失治。逆傳心胞絡。幼科多不知者。俗醫見身熱咳喘。不知肺病在上之旨。妄投荊防。

柴葛加入枳朴杏蘇。荀子查麥廣皮之屬。輒云解肌消食。有見痰喘。便用大黃。蒙石滾痰丸。大便數行。上熱愈結。幼穉穀少。胃薄表裏苦辛。化燥胃汁已傷。復用大黃大苦沉降丸藥。致脾胃陽和傷極。陡變驚癇。莫救者多矣。

按此症風溫肺病。治在上焦。夫風溫春溫忌汗。初病投劑宜用辛涼。若雜入消導發散。不但與肺病無涉。劫盡胃汁。肺乏津液。上供頭目清竅。徒爲熱氣薰蒸。鼻乾如煤。目瞑或上竄無淚。或熱深肢厥。狂躁溺瀉。胸高氣促。皆是肺氣不宣。化之徵斯時。若以肺藥少加一味清降。使藥力不致直趨腸中。而上痺可開。諸

竅自爽。無如城市庸醫。僉云結胸。皆用連薤柴枳苦寒直降。閉塞愈甚。告斃甚多。

按此症初因發熱喘嗽。首用辛涼。清肅上焦。如薄荷連翹牛蒡象貝桑葉沙參梔皮薤皮花粉。若色蒼熱勝煩渴。用石膏竹葉辛寒清散。痧症亦當宗此。若日數漸多。邪不得解。苓連涼膈。亦可選用。至熱邪逆傳入膈中。神昏目瞑。鼻竅無涕淚。諸竅欲閉。其勢危急。必用至寶丹。或牛黃清心丸。病減後。餘熱只甘寒清養胃陰足矣。按首用辛涼。清肅上焦。須是認定風溫。肺氣不勝其散。以致喘嗽。若稍涉風寒。咳聲緊悶。便不可用。誤用卽閉邪成癆怯。

備用方

葦莖湯

清心涼膈散

涼膈散

瀉白散

葶薈大棗湯

白虎湯

至寶丹

清心牛黃丸

竹葉石膏湯

喻氏清燥救肺湯

夏熱

夏爲熱病。然夏至已前。時令未爲大熱。經以先夏至病
溫。後夏至病暑。溫邪前已申明。暑熱一症。幼醫易眩。
夏暑發自陽明。古人以白虎湯爲主方。後賢劉河間
創議。迥出諸家。謂溫熱時邪。當分三焦投藥。以苦辛
寒爲主。若拘六經分症。仍是傷寒治法。致悞多矣。蓋
傷寒外受之寒。必先從汗解。辛溫散邪。是已。口鼻吸
入之寒。卽爲中寒陰病。治當溫裏分三陰見症施治。
若夫暑病。端方甚少。皆因前人略於暑。詳於寒耳。考
古如金匱暑暍瘧之因。而潔古以動靜分中暑中熱。
各具至理。茲不槩述。論幼科病暑熱夾雜別病有諸。
而時下不外發散消導。加入香薷一味。或六一散一。

服考本草香薷辛溫發汗能泄宿水夏熱氣閉無汗
渴飲停水香薷必佐杏仁以杏仁苦降泄氣大順散
取義若此長夏溼令暑必兼溼暑傷氣分溼亦傷氣
汗則耗氣傷陽胃汁大受劫爍變病由此甚多發泄
司令裏真自虛張鳳達云暑病首用辛涼繼用甘寒
再用酸泄微斂不必用下可稱要言不煩矣然幼科
因暑熱蔓延變生他病茲摘其槩按口鼻吸入之寒其重者爲中寒其輕者不得爲中寒而總屬陰病治宜溫裏乃不易之理已詳注前節先生真先得我心者至於溫暑起手卽用辛涼甘寒直須認定不夾風寒方可若因風寒久閉內氣化熱便當別議內化熱而外寒已開者或從燥熱或從溼熱隨證治之外寒仍閉者其內必非真熱只是衛陽內陷治宜鼓舞正氣衛通寒解而熱自消散

受熱厥逆

夏令受熱昏迷若驚此爲暑厥卽熱氣閉塞孔竅所致其邪入絡與中絡同法牛黃丸至寶丹芳香利竅可效神甦以後用清涼血分如連翹心竹葉心玄參細生地鮮生地二冬之屬此症初起大忌風藥初病暑熱傷氣竹葉石膏湯或清肺輕劑大凡熱深厥深四肢逆冷但看面垢齒燥二便不通或瀉不爽爲是大忌誤認傷寒也

按熱性散越何致閉塞此必乘風飲冷所迫觀起手用芳香通竅可知矣

若真因暑汗太過肺氣不續津液內傷燥火燔灼以致昏厥尙可用此速其散脫耶

疳

幼兒斷乳納食值夏月脾胃主氣易於肚膨泄瀉頭熱

手足心熱形體日瘦或煩渴善食漸成五疳積聚當
審體之強弱病之新久有餘者當疏胃清熱食不入
糞色白或不化當健脾佐消導清熱若溼熱內鬱蟲
積腹痛導滯驅蟲微下之緩調用肥兒丸之屬

口疳

夏季秋熱小兒泄瀉或初愈未愈滿口皆生疳蝕嘗有
阻塞咽喉致危者此皆在裏溼盛生熱熱氣蒸灼津
液不升溼熱偏傷氣分治在上焦或佐淡滲世俗常
刮西瓜翠衣治疳取其輕揚滲利也

脹

夏季溼熱鬱蒸脾胃氣弱水穀之氣不運溫着內蘊爲

熱漸至浮腫腹脹。小水不利。治之非法。水溼久漬。逆
行犯肺。必生咳嗽喘促。甚則坐不得卧。俯不能仰。危
期速矣。大凡喘必生脹。脹必生喘。方書以先喘後脹
者。治在肺。先脹後喘者。治在脾。亦定論也。金匱有風
水皮水石水正水黃汗。以分表裏之治。河間有三焦
分消。子和有磨積逐水。皆有奧義。學者不可不潛心
體認。難以槩述。閱近代世俗論水溼喘脹之症。以內
經開鬼門取汗爲表治。分利小便潔淨府爲裏治。經
旨病能篇。謂諸溼腫滿皆屬於脾。以健脾燥溼爲穩
治。治之不效。技窮束手矣。不知凡病皆本乎陰陽。通
表利小便。乃宣經氣利腑氣。是陽病治法。暖水臟溫。

脾腎補土以驅水是陰病治法治肺痺以輕開上治

脾必佐溫通若陰陽表裏乖違臟真日漓陰陽不運

亦必作脹治以通陽乃可奏績如局方禹餘糧丸甚

至三焦交阻必用分消腸胃窒塞必用下奪然不得

與傷寒實熱同例擅投硝黃枳朴擾動陰血若太陰

脾臟飲溼阻氣溫之補之不應欲用下法少少甘遂

爲丸可也其治實症選用方法備採按中間水溼久

段最宜細參此當辛散淡滲并用近世見其喘促

每用辛涼清肅以致危殆陳脩園亦謂久咳則火

上升子細察病者多是久咳則水氣逆射推原其

理是由肺氣不能順降水道不能通調也故久咳

聲悶坐不能卧者必用

備用方

五苓小青龍法乃效